

SOLICITUDE DE COMPARECENCIA DO ALCALDE SOBRE A PISCINA DE CHAPELA

PLENO 30 ABRIL 2015. ACTA 08/2015

Na parroquia de Chapela, a indignación da veciñanza é palpable por mor dos numerosos problemas técnicos e construtivos que están aparecendo no Centro de Deportes Acuáticos de Chapela dende a súa apertura.

O primeiro en sufrir as consecuencias foi o Club de Remo, con problemas na auga quente. Os usuarios e usuarias sufriron problemas cos desaugadoiros das duchas e coas taquillas e portas. Despois viu a avaría da deshumidificadora, e os fumes da caldeira de apoio á enerxía xeotérmica. Por último un novo problema deste desastre construtivo asoma pola porta deste goberno: a cuberta da piscina ten pingueiras. Nada novo para este concello, acostumados ás filtracións nos edificios municipais.

Polo anteriormente exposto, e porque retirar a placa da piscina non significa a fin dos problemas desta obra faraónica, solicitamos a comparecencia do alcalde para que:

- Explique como e cando se van a arranxar as pingueiras da cuberta da piscina e cal é o seu presuposto.
- Dea conta dos gastos, ata o momento, dos problemas técnicos e construtivos mencionados anteriormente
- Explique a situación dos tramites xurídicos que está levando a cabo o Concello para reclamar eses gastos as empresas construtoras.”

O alcalde sinala que cando chegaron ao Concello no ano 2011 tiña que entrar en funcionamento a piscina de Chapela que, a pesares de estar inaugurada, non podía funcionar xa que non tiña acometidas de auga nin electricidade nin estaba acondicionado o entorno e o concurso para a súa xestión quedara deserto. Tamén houbo problemas co Club de Remo posto que tiñan entrada de augas pluviais e fecais, e se atopaba pendente a liquidación coas empresas construtoras. Di que os atrancos se foron solventando un a un e a piscina se puxo en funcionamento e aí foi onde se empezou a comprobar se estaba ou non ben construída.

Apareceron novos problemas e algúns foron resoltos pola propia concesionaria pero ao Concello tocoulle unha parte moi importante e todo está recollido nunha resolución da Alcaldía de setembro de 2014 a partir da cal produciuse a incautación de garantías. Indica que o Concello non quedou de brazos cruzados e tal efecto lee parte de dita resolución que obra no expediente administrativo ao que teñen acceso tanto AER como o resto dos grupos da corporación.

O concelleiro BLANCO PEREZ di que en marzo de 2012 houbo unha xuntanza en Chapela na que o goberno referiuse ao goberno anterior sinalando o mal que o fixeron. Pregunta quen é responsable de que os equipos deran problemas e non se fixera antes un estudio de viabilidade para comprobar o funcionamento. Considera que fixeron o que tiñan que facer pero hai moitas queixas polas pingueiras e a caldeira sigue dando problemas. Pide que se convoque a convocatoria da comisión de investigación da piscina.

O alcalde sinala que o que se fixo foi respostar ás cuestións que se plantexaron en cada momento. Di que os problemas aparecen cando a instalación empeza a funcionar e que agora teñen este último problema e se está a desenvolver o procedemento correspondente. O expediente sempre estivo a disposición de calquera dos membros de AER. Di que van defender os intereses dos cidadáns de Redondela. No caso da piscina di que a puxeron en marcha resolvendo as carencias.